

陶文毅公全集

陶文毅公全集卷二十四目錄

奏疏 緝捕

請嚴湖南礦禁摺子

條陳緝捕皖豫等省紅鬚匪徒摺子

嚴緝潁亳一帶匪徒懲辦附片

訪獲潁鳳一帶匪徒懲辦附片

續獲潁鳳匪徒懲辦附片

續獲潁鳳泗等處匪徒懲辦附片

續獲亳泗匪徒懲辦附片

續獲結盟匪犯多名移交新撫審辦附片

籌款飭繳兇器摺子

飭屬嚴拏匪犯懲辦附片

請將徐淮海匪徒鎖繫鐵桿摺子

拏獲徐海一帶匪徒審辦附片

訪獲積年包訟棍徒並究出在京攬訟各犯請飭

拏解歸案審辦摺子

拏獲鄰省著名巨匪審辦附片

拏獲兇盜習教等犯審辦附片

拏獲假照案內要犯摺子

奏疏

緝捕

請嚴湖南礦禁摺子

奏爲奸民盜開礦版請

旨嚴行封禁事竊

臣

聞湖南辰州屬之沅陵縣有地名

大油山在清浪灘之上山險水惡數十里人烟絕
少最利藏奸前年此山偶出金礦輒有奸民乘機
盜挖數月之間聚衆數千地方官往捕當經嚇散
而根株未靖仍有偷挖之事本年辰沅饑饉百姓
乏食咸以此山有金可採冒死爭赴並有他處聞
風而往者日聚日多其勢復將犯禁查大油山叢

爾一區爲山甚小無論礦竭之日難於遣散而此時辰沅荒歉穀米騰貴本地之民尙且乏食安能供此日益月增之衆况礦徒兇橫者多往往不顧身家性命沅陵偏近苗疆山深地阻聚此千百無籍之徒於險惡之區爲聚而難散之勢其爲害誠非淺鮮現雖有官駐守誠恐員微力弱難資彈壓應請

敕下湖南巡撫速飭該府親往設法遣散毋使奸民嘯聚致釀事端仍將此山永行封禁以絕希冀之心而杜將來之患再者湖南所屬如安化攸縣新化

邵陽武岡新寧東安辰谿瀘溪石門慈利永定桂陽桂東臨武各州縣向產鐵礦有題明開採者亦有私行開挖者因係內地向無妨礙然礦洞幽深曲折易於窩藏盜竊且穿崖越嶺長至二三里及四五里不等往往洞口開於此山而偷挖彼山之礦甚者斷山截脈壞及墳塋住址殘毀可傷爭端易起聚衆械鬪涉訟釀命者不一而足竊思此等礦山雖未能盡行封禁亦宜妥爲防範毋使滋生事端應並請

賜諭該地方官剴切出示毋許偷挖如有鑿毀人家墳

地及窩藏盜竊者從嚴辦理有犯卽懲於以澤枯
骨而靖奸藪地方幸甚臣爲預防礦徒爲害起見
是否有當伏祈

皇上睿鑒謹

奏

嘉慶十九年九月十七日奏本日奉

諭旨一道寄交湖南巡撫查禁

條陳緝捕皖豫等省紅鬚匪徒摺子

奏爲紅鬚匪徒日熾敬陳三急五宜以殄渠魁而弭
後患事竊臣聞安徽之廬鳳潁亳河南之南汝光
陳等處向有匪徒名曰紅鬚子其兇橫不法之狀
自已久達

天聽臣近日細加訪察不但緝捕難於得力且有兇焰
日張大非昔比不可不速爲殄除者謹將急切情
形並緝捕事宜一一爲

皇上陳之

一匪徒前此猶散而今則日聚也查紅鬚原係白

蓮教匪漏網之人間出偷竊身帶小刀爲防身之具人以其兇猛故取戲劇中好勇鬪狠面掛紅鬚者名之然匪徒聞知猶以爲怒也近則居之不疑成羣結隊白晝橫行每一股謂之一捻子小捻子數人數十人大捻子一二百人不等恃其羽翼或劫人貲財或搶人妻女或當街臨市而喝人脫去衣裳且剗人眼睛謂之滅燈刀扼人頸謂之禁聲據險扼隘突起搶奪謂之打悶棍皆以夥羣日衆故爾肆行無忌此殄除之當急者一也

一匪徒前此有黨而今則有目也查匪徒零星藏匿彼此聲息不通猶易緝捕近則公然具有頭目羣相護從聽其指揮每要約百姓人家具備酒食蜂擁而至飲啗狼籍食畢放礮三聲而去此風河南之息縣光山正陽羅山汝陽項城爲尤甚其在逃未獲之王妮子實卽頭目而地方官捏稱爲從者也其在安徽者則李東山馬大振二人最爲出名劇匪現在藏匿阜陽縣境內每人手下約有千人此殄除之當急者二也

一匪徒前此猶畏官而近則官反退縮也查此等

匪徒皆因十年前之地方官因循貽誤養成後患此時徒類既衆益復膽大妄爲其器械則有擡槍兩人共舉一發可傷十數人不止掖刀已也地方官每有緝捕要犯不敢明拏非用數百金購線不能獲一人若僅帶差勇搗其巢穴則匪黨出入皆用擡槍不唯恐傷良民卽官役受傷已成激變各上司帶兵入境一兩月不能獲犯而地方官已筋疲力盡惟有隱忍不言顛預了事以圖目前之苟安而已匪徒悉此情形是以愈無忌憚此殄除之當急者三也

一靖匪徒宜官民一心也查匪黨雖多總不及良民十分之一徒以地方官吏養患已久告之於官官未必理而匪徒因此懷恨其受害更深卽使官爲辦理而吏役之使費衙門之陋規已攫其貲產之半矣是以甘心求免於匪徒而不肯更受官吏之害此實現在各省患盜之通弊欲求除莠安良非官爲百姓大作主張不可

一靖匪徒宜上下一心也州縣官號稱民牧祛除害馬是其專責然必上司賞罰嚴明始能令下如流若費力不討好其能實心任事者有幾

臣

聞豫省紅鬚其初本未猖獗自王侁子一案公然抗拒官兵未加懲創以致匪徒罔知顧忌此時勢焰漸成地方官未免畏首畏尾非上司爲州縣大作主張不可

一靖匪徒宜鄰境一心也查匪徒往來無定此拏彼竄其聚處多在鄰省交界及各州縣接壤之所此等處所名爲三不管每有失事案件地方官輒互相推諉以圖免處分而盜賊卽利此以爲窩穴查例載凡交界地方失事無論隔縣隔府隔省一面差役往拏一面移文關會協緝倘

有疎縱牽掣交部分別議處是此等藏賊之所
例有專條豈容推卸至若大捻匪徒尤非一州
一縣所能捕淨雖非所屬地方亦應三面會合
文武協力同時掩捕俾巨惡就擒而後餘匪可
挨次而理矣

一靖匪徒宜另置重典也紅鬍匪黨帶刀出入本
易辨別徒以所犯劫搶百姓畏其結怨多不報
官立案偶爾緝獲既無死法及至傷人殺人則
又慮及處分將就了事並不提出紅鬍二字致
與平民鬪毆之案無異無所懲創伏查現行條

例所載如川省囑匪浙西棚民臺灣不法棍徒以及回民搶奪苗蠻仇殺江南沙民械鬪之類皆因地制宜別設專條今紅鬍之害倍甚於此應請嗣後安徽河南等處匪徒犯事審係帶刀者申明從重辦理毋得僅以順拔小刀拒毆適斃爲辭庶隨案懲辦而匪黨之勢亦可漸殺矣一靖匪徒宜平鹽價也查安省之潁亳豫省之汝光一帶例食淮鹽現在每斤值錢四五十文不等長蘆私鹽每斤不及半價是以居民利食私鹽其間私販鹽梟實繁有徒而紅鬍則爲之護

送每車私鹽索錢二百文每日私鹽不啻百輛
賭博酒肉之費皆出於此鹽車不足乃出而劫
搶竊思淮蘆各鹽銷售原有定地若稍爲調劑
或將淮鹽引地酌撥蘆綱而以淮綱之稅酌攤
蘆引之內一轉移間私鹽不緝自淨但此事非
一刻所能妥議且必紅鬚先淨而後可以辦理
否則若輩失此口食之費其搶掠更急惟善後
之策似宜籌畫及此爲久安長治之計耳
以上情形雖非起自近日而近日更甚誠宜及早
綢繆庶不致釀成後患爲此謹

奏伏祈

皇上睿鑒謹

奏

嘉慶十九年十一月二十一日奏本日奉

上諭軍機大臣等御史陶澍奏紅鬍匪徒日熾敬陳緝捕事宜一摺河南南汝光一帶以及安徽潁亳等處向多紅鬍匪徒屢經降旨飭緝總未斂戢今據該御史奏稱近來日聚日多橫行益甚每一股謂之一捻子小捻子數人數十大捻子一二百人不等成羣結隊公肆搶劫或奪人貲財或搶人妻女甚至乞人

目睛且有頭目指揮河南之息縣光山正陽羅山汝陽項城爲尤甚其在逃未獲之王妮子卽屬頭目而地方捏稱爲從其在安徽省有李東山馬大振二人最爲出名現在藏匿阜陽縣境內每人手下約有千人州縣顛預不辦等語除蒞安良爲地方官專責若畏難不辦日久養癰益滋隱患該御史摺內指陳人名地名鑿鑿有據其言必非無因且該匪徒夥黨約有千人則在逃未獲之逆犯祝現劉成章等難保不投入其中冀延殘喘著方受疇胡克家各遴派委員在河南息縣等處安省阜陽境內將王妮子李東山

馬大振三犯按名捕獲審明嚴辦並密訪各犯有無
漏跡在內者設法查拏毋稍疏縱再本年安省額毫
一帶收成歉薄飢民甚多胡克家尤當密諭委員持
以鎮靜務須不動聲色將指拏匪徒逸犯嚴密蹣緝
首犯就獲則其餘夥黨自必畏懼解散不可張皇海
捕致令夥衆驚擾激成事端此爲至要欽此

嚴緝潁亳一帶匪徒懲辦附片

再臣現因巡閱經過潁亳蒙宿等處察看間閭均屬安靜民情亦俱質實惟西北一帶緊鄰豫省迤東接近徐淮交界處所多有匪徒出沒此孽彼竄刻須防範前據阜陽縣拏獲河南省逸犯王四卽王相如查係回民劉三軒挾嫌刺殺縣丞王慶瀾案內從犯已解歸河南審辦現又據蒙城縣報獲王懷正卽王四老虎強搶民婦拒殺事主一案又謝幅慘殺引差緝匪之保正李時一案又霍邱縣叢四陳全等挾葉連作線捉拏之嫌殺死伊家七

命並殺捕役王爽一案此數案皆因緝捕緊嚴逞

兇報復情節尤爲可惡經

臣

嚴飭勒緝已據該縣

等緝獲兇犯俟

臣

回省卽行從嚴辦理

臣

現又沿

途訪得阜陽縣匪徒李天罡趙四大王張保兒劉

八兒鞏三秦照夏五國公張細狗亳州匪徒王甫

懷遠縣匪徒褚會明壽州匪徒程茂王添曉蒙城

縣匪徒王現王愷王騷崔四蔡五宿州匪徒楊大

沉李克盛陳大勝武炳文武中信卽武蟒精郃三

張七李冤王周小二姐洪澤湖匪徒張建仁張建

禮卽張三丫頭均係兇惡匪徒有現據地方官拏

獲者有尚未緝獲者臣沿路密派員弁不動聲色
分路偵查得有蹤跡卽知會文武無分畛域立時
掩捕並告以如果出力定當據實獎勵總期有犯
必獲以靖地方合將沿途密訪嚴緝情形附片具

陳謹

奏

道光三年四月十七日奉到

硃批所辦甚好知道了欽此

訪獲潁鳳一帶匪徒懲辦附片

再_臣前於巡閱潁鳳一帶訪有積惡匪徒二十八

名附片具

奏在案

_臣

比卽密派員弁改裝易服不動聲色分路

偵緝旋據委員候補從九品金應祁把總李義等

會同地方文武將王添曉武炳元卽武炳文卽三

楊大沅陳茂卽程茂王愷卽王琯拏獲內王添曉

武炳文王愷三名接據督

_臣

孫玉庭來信現在奉

旨查拏當卽派員押送江寧歸案審辦又張建禮一名

亦經署靈璧縣黃光裕會同督

_臣

委員拏獲解往

江寧續又據各屬暨委員主簿何瑋從九張鈞金應祁等拏獲褚會明王甫王騷李冤王其李克盛劉八兒夏五國公卽夏寬張細狗卽趙細狗亦經宿州知州蘇元璫前署宿州劉用錫阜陽縣知縣孫靈府先後拏獲又據蒙城縣楊圻派丁赴河南永城縣拏獲蔡五一名惟武蟒精經宿州拏獲後病死張建仁一名亦先經病死計臣途次所奏各犯已獲十七名已死二名尙有李天罡張保兒周小二姐等出入徐豫各境一俟偵有回籍消息卽可立時掩獲此外又據宿州獲有趙克義周作浩

盱眙獲有馬克簡卽馬四長腿梁廷棟石文彩蔣學韜壽州獲有王添曉打手卞二麻均係積惡匪徒經臣節飭查拏陸續就獲各員弁頗知奮勉至拏獲各犯獷悍素著百姓畏其挾嫌報復往往受害不敢報官現在嚴查究訊或空人眼睛或庇藏梟匪或拒捕脫逃實屬兇惡匪徒應照例重辦卽或無案可查亦當嚴行懲押以靖地方其從前因緝捕被害如葉連一案業已兇犯全獲按律懲辦尙有蒙城縣范羅村地保李時因捕拏賊匪謝幅被其慘札多傷斃命除謝幅業已就獲另行照例

辦理外臣仍酌賞銀兩給李時家屬俾因公受害者有所獎卹庶良懦之氣獲伸而匪徒無從託足矣所有現獲匪犯懲辦情形合併附片以

聞謹

奏

道光三年六月二十三日奉到

硃批所辦甚好知道了欽此

續獲潁鳳匪徒懲辦附片

再臣前於巡閱潁鳳時訪有積惡匪徒當卽密派員弁會同地方文武分路偵緝獲犯王添曉李克盛等十餘名先後附

奏在案尙有趙四等未獲復督飭嚴拏茲據潁州營遊擊彭鎮川稟據候補外委王梅馬占鰲等督同府縣各役訪至河南鹿邑縣拏獲張保兒一名解交阜陽縣訊據該犯前因楊印窺破伊父竊情隨同病故之竊匪王義將楊印綑縛掇棄河內溺斃被獲擬絞道光元年六月恭逢

恩赦釋放仍以搶竊爲事糾夥王寅馬鎖等屢次竊奪
牛隻勒贖各事主畏其兇惡均未報案又據阜陽
縣知縣孫靈府稟同候補千總呂秉悅等踴探得
趙四鞏三在河南邊界藏匿隨飭兵役拏獲鞏三
一名復又追至距阜境三百餘里之項城縣南頓
地方設法將趙四誘出同該境兵役圍拏擒獲搜
出身帶標刀二把並獲積兇捻夥楊氣一名解經
孫靈府究出該犯趙四綽號趙四大王又號趙四
老虎曾同楊氣及夏五岡公卽夏寬等二十餘人
結捻持刀往來豫省邊界糾竊勒贖多次並點放

擡槍逞兇糾毆事主多未報案並聽從尹刻榮毆
死王東山隨同丁大漢行劫李來泰貨店等情又
據阜陽縣役會同新蔡縣役拏獲秦照一名有匪
黨黃狗邀人迫奪當卽繞道至新蔡縣將秦照暫
交收管稟請咨題前來臣查趙四係著名捻首楊
氣相爲狼狽鄉民被害不敢聲張此拏彼竄從未
獲案此番追蹤至豫一併就獲必須窮究黨夥無
分畛域密拏嚴懲以靖地方除飛咨河南撫臣飭
將秦照解穎歸案辦理外所有續獲匪犯審辦緣
由合併附片以

聞謹

奏

道光三年六月二十三日奉到

硃批所辦甚好設法偵緝務淨根株欽此

續獲潁鳳泗等處匪徒懲辦附片

再臣前於北閱時訪有潁鳳泗等處積惡匪徒當派員弁設法偵緝業已陸續獲犯趙四老虎王添曉等二十餘名節次附

奏在案尙有李天罡等在逃臣以該犯係著名搶匪必須嚴緝務獲復催飭勒緝並飭此外如有匪徒竄入一併嚴拏究辦以靖根株茲據署潁州府牛映奎阜陽縣孫靈府具稟於七月二十九日訪得李天罡潛回家內當卽會同千總甯樹琪飛往緝捕詎該犯兇惡異常聲稱扎死數人死亦甘心卽

口銜攬刀手執庫刀撲出拒捕被縣役格傷項頸
兵役四面圍拏該犯料難脫身用刀自扎肚臍當
被擒獲並起獲擡槍二杆刀四把長槍十八根訊
據該犯供認結捻逞兇情急自戕屬實詰以捻夥
何人該犯恃傷聲哼現在撥醫敷治一面查案研
鞫等情又據盱眙縣知縣周士鈺稟稱會營拏獲
朱圭孜一名係江蘇沐陽縣拒傷事主逸犯有沐
陽縣役協拏又獲張二卽顧發才一名據供曾在
山東博興縣拒殺捕役又據署靈璧縣黃光裕同
千總侯正陞拏獲江蘇睢寧縣劫犯拒捕案內逸

匪胡元忠及苟添鳳二名又獲江蘇銅山縣拒捕
傷人案內逸盜常二王和尚趙套王黑四名俱有
各該縣原役協拏押歸犯事地方審辦臣查皖省
近北一帶接連徐豫匪徒出沒最爲閭閻之害現
據各該屬所稟匪徒竄入俱卽就獲緝捕尙無鬆
懈至大江兩岸被水之處甚多誠恐有竊盜潛滋
爲害商旅臣已嚴飭巡江文武梭織稽查並又添
派幹員併力嚴巡地方均各救謐所有飭屬緝捕
情形合併附片以

聞謹

奏

道光三年九月二十七日奉到

硃批所辦甚好隨時認真嚴密督緝除暴安良地方靖
謐方爲不負委任也勉之欽此又於被縣役格傷句

旁奉

硃批應獎賞欽此

續獲毫泗匪徒懲辦附片

再前次訪有潁鳳等處積惡匪徒常派員弁拏獲趙四老虎等二十餘名節次附

奏在案尚有張七等在逃

臣

復嚴飭勒緝茲據宿州

知州蘇元璫稟稱將張七拏獲訊認爲匪屬實又訂期會同亳州在於交界處所巡哨另獲匪犯張六王破趙年趙萬劉狗范生王五曹經曹明志曹景沅張尿等十一名現在嚴審究辦並據亳州知州任壽世稟獲趙西城一名訊係行劫碭山縣事主董發祥案內逸盜又獲王二一名訊係行劫太

和縣事主王同聚案內盜犯均有各該縣緝役協
拏已解歸犯事地方審辦又據泗州州判宋盛麟
稟同州役營兵盤獲匪犯沈魁曹二劉潮金顧大
顧三王起盈王老漢等七名並接獲鐵銃長槍鐵
尺鐵鑿等具訊係向在淮湖等處乘船滋擾現俱
嚴審究辦至皖省江面延袤六百餘里時屆嚴冬
宵小易生經臣嚴飭沿江州縣設卡巡緝並添派
幹員分段巡查現據委員劉際昌標弁王應魁等
稟稱沿江上下晝夜梭巡並無失事惟巡至和州
鮎魚嘴地方時近昏黑有盜潛上客船持刀扭砍

客商該員弁等當同該州兵役趕往圍拏盜匪持
刀逃走追陷泥中當被擒獲查詢該犯名胡和尚
又名胡高腳其同夥奚義全朱升等攜帶妻室詭
易姓名逃至鳳陽縣界亦經和州丁役協同該縣
盤獲解審其餘各屬均屬安靜臣仍嚴飭各員弁
始終勿懈以除稂莠而靖地方合併附片以

聞謹

奏

道光四年正月十一日奉到

硃批查拏甚屬認真知道了欽此

拏獲結盟匪犯多名移交新撫審辦附片

再鳳潁一帶與徐豫毘連向爲匪徒出沒之所經

臣節次飭拏獲有兇盜匪棍百數十名嚴行懲辦

地方稍資安戢誠恐各牧令始勤終怠復飭隨時

訪查勿稍鬆勁茲據宿州知州蘇元璐具稟訪得

巨匪管希文等有異姓結盟聚匪滋害之事當卽

會營先獲韓起分王合僧原青三名究出管希文

起意結拜弟兄首從共三十餘人飭差嚴拘又獲

高得芳高得茂二名被管希文帶領多人在途劫

去等情臣查管希文前曾共毆梁得金身死並糾

同賈孟西等二十二人結拜弟兄犯案從重擬流
恭逢

恩詔免罪今復結盟奪犯實屬怙惡兇橫其聽糾黨夥
亦均係匪徒必須嚴拏懲治以絕根株當飭各屬
文武會同堵緝卽據亳州知州任壽世密偵得首
犯管希文在雉河集藏匿星夜馳往率同巡檢余
桂森候補府經歷陸耀如外委郝凌雲等各帶兵
役四面圍拏該犯管希文膽敢率夥執持刀械拒
捕被兵役打倒捆住並獲夥犯姚進禮黃金梅陳
幅謝宜鄭炳雪等五名復協同河南永城縣四面

掩捕又獲夥犯李合正劉希珠江有富高得強高
福齊高得芳申尙有王應沉朱炳照朱彩彰孫宏
進朱鳳淋賀立本劉思樹李二呼山宋傳經陳懷
璧高得茂英九思胡心朋等二十名就近交永城
縣研訊並據該州蘇元璐拏獲董思渠江有序張
悅秦棕堯陳連董廷桂相景度謝光得張禿匠董
玉球等十名又據潁上縣知縣劉耀椿拏獲丁四
歪孜楊二泮等二名隔別研究俱供結盟奪犯係
管希文造意爲首惟同夥人數間有參差並究出
僧原清尙有搶占婦女情事先後錄供稟報前來

臣查管希文等甫經聚眾結盟卽經該州等訪聞
拘獲首從四十餘名緝捕尙屬認真此等匪徒愍
不畏法必須提省嚴究盡法處治以除地方之害
當卽飛提並咨會河南撫臣飭緝各犯來皖歸案
審辦現據陸續解犯到省尙未齊全正在提審間
臣奉

諭旨調任江蘇巡撫卽行起程除移交新任安徽撫臣
張師誠催提未到各犯一併嚴審究辦外合將拏
獲結盟匪犯情形附片奏

聞伏乞

聖鑒謹

奏

道光五年七月初五日奉到

硃批查拏甚好知道了欽此

籌款飭繳兇器摺子

奏爲籌款飭繳兇器以重民命而靖地方仰祈

聖鑒事竊照皖省鳳潁泗州等屬界連徐豫民情好鬪動輒傷人其傷人之具烏槍而外多屬金刃緣該境愚民久沿惡習往往藏置例禁刀槍以爲保衛身家之用迨藏之既久日與器習偶然爭角順手取攜鬪無不傷傷無不死爲禍之烈與烏槍等此而不設法以籌之非所以重民命而靖地方也臣以爲嚴查飭禁或致滋擾不若因勢利導使民易從恭查前奉

諭旨民間私藏鳥槍積習相沿一旦搜拏治罪未免有
滋擾累著通諭各省出示曉諭准其呈繳給價等因
欽遵在案敬繹

訓示實爲良法美意

臣推廣

聖訓屢諭鳳潯泗三屬民人將刀槍等項違禁器物同
鳥槍一併繳官給價然非籌款發給價銀恐小民
顧惜薄值難期踴躍查蕪關有解交撫署公用銀
兩經前撫臣李鴻賓奏明每歲酌撥銀四千兩解
存藩庫以爲緝捕公費除連年因公動用外截至
本年五月底尙存銀六千四十五兩零前項銀兩

本由巡撫衙門劃出爲緝捕之用自可以公濟公
臣業於前款內飭司撥銀二千兩解交廬鳳道戴
聰酌量分給各屬爲呈繳各器械價值並飭各牧
令廣爲勸諭務令小民咸知將烏槍刀槍等項兇
器悉數繳官一俟繳到卽隨時發價俾知踴躍仍
飭不得假手書役致滋擾累并將收繳件數按月
一報期於盡淨而後已如此辦理庶收繳不託空
言帶刀或能衰息於整飭民風似有裨益合將籌
辦緣由恭摺奏

聞伏乞

陸文毅公全集

卷二十四

三

皇上聖鑒謹

奏

道光五年七月初十日奉到

硃批知道了欽此

飭屬嚴拏匪犯懲辦附片

再江蘇省徐邳淮海一帶與皖豫山東等處犬牙相錯爲梟匪出沒之所逃兇逃盜間亦潛匿隱伏此拏彼竄每難就獲臣抵任後與督臣琦善面商嚴飭地方文武無分畛域設法堵拏旋據各營縣緝獲梟徒賀三虎等二百餘名因人數較多逐程解蘇有需往返當經督臣飭委運司就近審辦此外又據海州獲犯尹廣修等泰州獲犯夏太等興化縣獲犯王繼茂等南匯縣獲犯李大觀等青浦縣獲犯張和等宿遷縣獲犯何德等睢寧縣獲犯

王學魁等贛榆縣獲犯彭貴等共計一百餘名或係結夥販私或係開巢護送均經會營拏獲起有刀槍火器車船私鹽等物並據江寧縣拏獲安徽當塗縣越獄重犯唐二湯二二名泰興縣拏獲上元縣逃兇程喜一名常熟縣拏獲崇明縣逃盜陳二顧大二名先後協同稟報經臣批飭臬司嚴審究辦此次各員弁破除畛域之見獲犯多名緝捕尙屬認真現值嚴冬宵小尤易竊發仍飭各屬督同兵役梭織巡查毋稍鬆勁以靖地方合將緝獲各匪分起辦理緣由附片以

聞謹

奏

道光六年正月初四日奉到

硃批禁暴安良地方大吏之先務汝能留意朕甚嘉焉
嗣後倍當奮勉摅除窩主尤爲扼要勉之毋忽欽此

請將徐海匪徒鎖繫鐵桿摺子

奏爲查辦刀械匪徒請嚴懲其始以資整飭仰祈

聖鑒事竊照江蘇省徐邳淮海一帶與皖豫山東等處
犬牙相錯匪徒惡棍出沒其間兼之民俗强悍以
佩刀執械爲能事傷人釀命之案倍於他屬屢經
臣督飭訪拏拘獲匪犯多名並起獲兇器等件疊
次附片

奏明懲辦在案惟查此等匪棍其始亦不過尋常游
手任性而行漫無拘束漸至三五聯絡藉端嚇詐
稍有睚眦卽拔刀相向庸懦畏勢不敢與較以致

益鳴得意愈肆橫行久之遂成掖刀渠惡騷擾棍徒兇搶仇殺爲害遂烈雖屢加創艾總未能杜絕根株良由習與性成其來已非一日查定例掖刀匪徒在於場市結夥搶奪原有斬絞之條棍徒生事行兇亦有遣戍之例一經犯案不難按例加重辦理而此等佩執兇器偶然挾詐逞兇平日又無犯法實跡按照本例僅止枷杖旣不敢稍存周內強相比附而責釋之後故智頓萌轉以輕於嘗試長其犯法之心實屬大爲民害臣思刑戮施於小人與其治之於已成而窮搜遠捕誅不勝誅自不

若防之於未然而小懲大誡辟以止辟伏查嘉慶十六七年間四川廣東兩省因緝匪及無籍棍徒攜帶刀械行竊嚇詐奏請鎖繫鐵桿欽奉

諭旨允行厥後匪徒稍知斂戢今江蘇省徐淮海三屬匪徒與四川廣東情形相類應請仿照該省成案除常用小刀不在例禁外如有佩帶兇器刀械之挾詐棍徒一經拏獲每名鎖繫鐵桿一枝以四十斤爲度定限一年果能改悔自新卽予釋放若不悛改再繫一年倘仍始終怙惡卽按其情節照棍徒屢次擾害行兇之例分別從嚴究辦庶幾消其桀

驚力挽頽風於懲創中卽寓振興之意再江蘇省
接近如山東之兗沂曹三府河南之汝陳光等府
州安徽之潁鳳泗三屬民情勁悍地界相連可否
一體仿照辦理於壤錯相連之處緝捕更爲有益
臣爲戢暴安良起見謹會同兩江總督臣琦善恭
摺具

奏伏乞

皇上聖鑒訓示遵行謹

奏

道光六年四月初三日奉到

硃批另有旨欽此同日奉到道光六年三月十七日內閣奉

上諭陶澍奏請嚴懲刀械匪徒一摺江蘇省徐邳淮海一帶與皖豫山東境壤毗連匪徒出沒每以佩刀持械爲能始則三五成羣藉端嚇詐繼則肆意橫行兇搶仇殺最爲地方之害茲據該撫以此等佩執兇器匪徒偶然挾詐逞兇平日又無犯法實跡按照本例僅止枷杖既未便照掖刀匪徒結夥搶奪及棍徒生事行兇之例強相比附而責釋之後故智頓萌轉以輕於嘗試長其犯法之心援照四川廣東懲辦結匪

棍徒之例鎖繫鐵桿以期小懲大誡著照所請嗣後江蘇徐淮海三屬匪徒如有佩帶兇器刀械挾詐逞兇者一經拏獲每名鎖繫鐵桿一枝重四十斤爲度定限一年果能改悔自新卽予釋放若不悛改再繫一年倘仍始終怙惡卽按其情節照棍徒屢次擾害行兇例分別從嚴究辦其接近江蘇之山東兗沂曹三府河南汝陳光等府州安徽潁鳳泗三屬民情强悍地界相連並著一體仿照辦理以挽頽風而安良善該部知道欽此

拏獲徐海一帶匪徒審辦附片

再徐海等屬向爲匪棍出沒之所經

臣

飭屬嚴拏

先後據獲梟徒兇盜共三百餘名分起審辦奏蒙

聖鑒在案誠恐宵小潛入復嚴飭巡緝茲據徐州府張

作楠轉據邳州李正鼎稟報獲有匪犯蕭玉明等

十餘名查起兇器十餘件又據海州營參將王慶

元稟報會同該州劉鈴等獲有匪犯祁三等十餘

名查起長槍一桿壯刀三把訊稱或係販私行竊

或在山東鄒城縣開場聚賭剽劫私鹽逃逸並據

署海州營參將吉祥保稟報會同該州劉鈴巡獲

賊匪費小虎等十餘名搜獲壯刀一口均認爲匪
不諱又據該參將吉祥保稟報拏獲鹽犯王三盛
千春等十餘名海州營錢家集都司周祐先後稟
報拏獲鹽犯鄒蘭王懷禮等十餘名均起有車輛
鹽斤又據護京口水師副將事署鎮江營參將秦
攀萼稟報督飭瓜洲營守備李長貴等拏獲梟匪
曹華拒傷線目並獲匪犯萬景興等起有刀秤等
物又據該參將秦攀萼稟報署高資營都司吳加
寶督率弁兵拏獲倂梟周得勝等共計拏獲匪徒
鹽犯七十餘名共獲私鹽數萬餘斤各等情臣查

刀槍兇器有干例禁現在人械並獲亟須究治且
恐各犯另有不法別案尤應嚴切根究俾無遁情
當經批行分別確審據實懲辦臣仍飭各屬實力
查拏期於有犯必獲以靖地方合將續獲各匪辦
理緣由附片以

聞謹

奏

道光六年四月初三日奉到

硃批所辦甚好欽此

訪獲積年包訟棍徒並究出在京攬訟各犯請飭
拏解歸案審辦摺子

奏爲訪獲勾結攬訟各棍徒並究出在京包攬遞呈
各犯請

旨飭拏歸案審辦事竊查近來京控省控各案往往情
節甚微而橫生枝節牽累多人一經質訊明確多
屬無辜問之原告又似非其本意臣細加察訪竟
係藉訟拖累冀圖訛索其中搭擡構釁包攬主唆
皆所不免亟應嚴拏以清訟源當諭臬司慶善遴
委幹員密訪旋據蘇州府陳鑾稟稱訪有南匯縣

監生葉墉在省開張客寓招集訟師包攬串訟隨會督委員通判徵良縣丞常恩等將葉墉及葉朝奎張金照周裕聲張秀王二趙徵王雪堂等先後拏獲到案並搜出詞底稿簿及搆訟書信各件訊據葉朝奎供葉墉係其堂弟在省以開店爲名專攬詞訟延請浙江石門縣監生張金照上海縣文生趙徵及王雪堂等商做詞狀張金照住近葉墉臥房從竈邊出入不輕出外凡有南滙人告狀皆葉墉等經手伊在店寫賬知有鍾振聲張壽昌孫嗣珍杜觀成於二月間同時進京告狀曾經葉墉

信燭在京包攬遞呈之金老四照應金老四帶領
鍾振聲等至李玉山家居住商量分起遞呈又有
京控之洪敘山並上控學院衙門之朱攀桂等及
上海人梅信昌訟事亦係葉墉包辦每案得受洋
錢多少不等張壽昌鍾振聲洪敘山呈詞係王雪
堂所做孫轎珍杜觀成梅信昌呈詞係張金照所
做葉墉詐得銀錢與趙徵等分用等語質之幫工
張秀王二俱供葉墉包訟屬實並據周裕聲供稱
伊因與女婿互控投託葉墉許爲包辦因其索取
洋錢過多伊給錢太少被葉墉詈罵攆逐未及般

寓被獲提訊王雪堂供認改做詞稿屬實前有吳柳溪到寓言及京控案件多在葉墉處等語惟葉墉張金照趙徵現尙恃符狡展不肯吐實請一併革審等情臣查葉墉係前次審結京控案內之人此次鍾振聲孫綱珍張壽昌及杜觀成等陸續京控均籍隸南匯以同路進京之四人分作四起控告其實俱係葉墉包攬指使無怪前後呈控情詞如出一手現在其兄葉朝奎供詞確鑿同案諸人亦供葉墉攬訟屬實查閱接出簿內鈔載道光六年七月十九日御史李逢辰條奏京控蠹吏重徵

苛斂欽奉

上諭一道又載戶部則例災蠲一條其餘多係呈底又書信數件內有云與楊姓不合亦欲相幫詞意顯與該縣作對扛幫訐告而張金照行篋所藏信稿皆影響暗昧之語就其文理可識者多係構串訟事有云以前涉手仇怨沸騰莫如暗中別事報他高樓看戰馬不傷脾胃使渠自顧不暇其結放鬆此古今訐訟第一上著也又云商通辦理一則檢得繳錢二則借刀殺人不傷情面又云暗使請一場官司與他喫不妨起起花頭伊必令張二老尋

你你格外殷勤可延宕日期與他辦明如在神威
矣又云趙大叔來云邇來精力不濟恍惚異常今
歲僅動筆你處兩紙餘不涉手意欲退避坐館閣
初八日批諭起來該落訴呈再上控敲足恐押抱
人不敢涉手又云一辦必訪一訪必審又云險連
我帶在其內幸用硬工撇掉又云日後遠颺別處
有何親情面目等語觀此數信其陰謀播弄暗地
唆訟及上控作詞之法均已直言不諱又慮訪押
審訊預謀遠颺鬼蜮情形歷歷如繪明係一夥訟
棍內外勾通串唆圖詐以致控案絡繹拖累無辜

大爲地方之害若不嚴拏重辦無以息刁風而安
良善除將葉墉等分別咨革究審外查常州府通
判徵良崑山縣縣丞常恩精明幹練遇事出力此
案係該二員設法訪獲現仍責令隨同該府緝拏
逸犯確訊究辦所有緝拏未獲之金老四李玉山
二犯究出現住京城及通州地方相應請
旨飭下步軍統領五城及順天府訪拏務獲解蘇歸案
審辦以期水落石出理合繕摺具

奏伏乞

皇上聖鑒謹

奏

道光七年六月二十三日奉到

硃批所辦甚屬可嘉另有諭旨欽此同日奉到道光七年六月初五日內閣奉

上諭陶澍奏訪獲勾結攬訟棍徒並究出在京包攬遞呈各犯請飭拏審辦一摺近年京控各案往往情節甚微橫生枝節牽累多人竟係訟棍藉案播弄經該撫密訪將積年包攬之葉塘等拏獲革審按出詞底稿簿及構訟書信各件所辦甚屬可嘉並供出現在京城及通州地方居住之金老四李玉山二犯內外

勾通串唆圖詐此而不嚴行懲辦何以息訟源而靖
刁風著步軍統領衙門五城及順天府按照該撫單
開各犯住址一體密速掩捕務獲解往江蘇歸案嚴
辦毋任遠颺漏網欽此

拏獲鄰省著名巨匪審辦附片

再淮徐等屬與河南安徽山東等處毘連向爲匪徒出沒之所經臣飭屬嚴查前後拏獲梟徒兇盜三百餘名分起審辦節次附

奏在案上年冰災較廣宵小尤易潛蹤復經嚴飭各屬加倍巡防毋稍鬆勁疊據豐縣稟獲黃貝卜豆等訊係夥劫山東魚臺縣錢店及河南夏邑縣事主趙學義家案內逸盜贛榆甘泉儀徵等縣稟獲相洲秦兆彩陳老漢王髻子等訊認行劫山東諸城縣事主逢九齡安徽天長縣事主刁延御等家

得贓不諱。陽山桃源等縣稟獲王鳳標、周禿子等審係銅山甘泉等縣事主劉玉魁等被劫案內之犯。又婁縣稟獲王言大、張秀沅、陳四、張阿得、張泳、青水、煙阿三等六名訊據王言大供認夥劫吳江縣事主袁岐昌家，並與張秀沅等疊竊多案。質之張秀沅等供亦相符。其水煙阿三係廣西省逃軍，曾竊事主沈瑞芝家贓逾滿貫，並據署上元縣縣丞章春奎稟獲葉加成、張二、張大小、吳、張、小王二、陳二、陳老等八犯，並起有刀棍槍頭等械，訊認夥劫安徽蕪湖縣事主徐永謙錢鋪得贓逃，逸移解。

上元縣審究犯供狡展解歸蕪湖查辦又據松江府知府李景嶧稟稱訪得積盜顧六夥黨甚盛出沒江浙兩省恣行盜竊查有署婁縣典史舒春元老幹勇健善於緝捕當令改裝易服會同武弁緝至浙江嘉興地方將該犯顧六及首夥蔡阿寶周阿寶擒獲發交婁縣審究等情臣查黃貝等均在鄰省鄰縣犯案一經入境卽據該縣等弋獲其顧六一犯係著名巨匪漏網多年該府等不分畛域遴委幹員踴躍偵緝卒使就擒兼獲夥犯緝捕尙屬認真當經批飭解歸犯事各縣分別審辦仍飭

實力查拏以期戢暴安良合將續獲各匪辦理緣
由附片以

聞伏乞

聖鑒謹

奏

道光七年八月二十日奉到

硃批所辦甚屬可嘉欽此

拏獲兇盜習教等犯審辦附片

再准徐松江揚州各屬毗連豫東濱臨江海向爲
兇徒出沒之所節經臣飭屬嚴拏梟匪兇盜不下
三百餘名分起審辦均經附片

奏明在案冬春之交糧艘往來絡繹匪徒尤易竄入
復經嚴飭各屬加意巡緝疊據清河銅山等縣稟
獲安徽梟匪穆虎及首兇郝元景訊認在靈璧縣
地方毆傷差役宣同身死宿遷沛縣並贛榆縣稟
獲逃兇顧三喜孫二逸盜朱三虎孫名先訊係在
直隸青縣砍死王三遼河南祥符縣殺死王四山

東蘭山縣搶奪宋建壽等拒殺事主案內之犯又據宿遷儀徵山陽武進等縣稟獲盜犯胡殿成張廷嵇士順嵇少白子張雙喜安應祥兇犯李文進等訊據供認竊劫清河高郵等州縣事主張張氏等家得贓挾嫌砍傷王全敬身死不諱並據南匯縣稟報先後訪獲盜匪莊秀等十五名訊認曾在龍頭山海洋行劫浙江事主應文英滬船衣物並將船隻拆毀又據蕭縣銅山縣稟稱接准河南永城縣關緝在豫傳教之聶士貞耿泳升二犯當卽會同碭山縣將耿泳升等拏獲接查該犯等家內

並無違礙經卷圖像據聶士貞供指曾拜耿泳升
爲師習教傳徒訊之耿泳升狡不吐實俱解豫質
審等情臣查穆虎等均在外省鄰縣犯案該縣等
留心察訪於各犯入境時卽行拏獲其在豫傳教
之聶士貞等接准該省咨緝單內尙有李連仲等
七名籍隸河南恐聞拏緊急遁入江境自應一體
堵緝免致兔脫當經批飭將各犯解歸犯事各州
縣審辦一面實力查拏毋稍鬆勁以絕根株而靖
地方合將續獲各匪辦理緣由附片以

聞伏乞

聖鑒謹

奏

道光八年四月十一日奉到

硃批嚴密查辦務淨根株斷不可稍有疏縱欽此

拏獲假照案內要犯摺子

奏爲拏獲假照案內要犯任松宇劉東昇二名遵

旨解京密辦由驛具

奏仰祈

聖鑒事竊

臣

於前月下旬連奉

諭旨飭拏蔡繩祖龐煥假照案內各要犯業將訪得劉
東昇等蹤蹟並設法查拏各情形附片覆

奏在案其時

臣

已遴派幹員分路踴緝並札臬司通

飭查拏因劉東昇等先已潛逃北上一面飛飭前
途截捕並咨會鄰省各關一體密速偵緝旋據清

河縣知縣加知州銜張心淵稟報於五月二十三
日接札卽日在該境臧家馬頭拏獲劉東昇及同
行之天津縣人李廷瑞比時長元吳三縣及沿河
各州縣兵役俱已趕至一併協獲又據臬司稟報
於五月二十七日據委員試用府經歷顧毓奇及
未入流金寶山等帶同府縣兵役將任松宇訪獲
先後批解前來臣卽督同蘇州府訊據任松宇供
稱年三十七歲曾在捐納房充當貼寫道光六年
上退出替蔡繩祖們書寫假照分給銀兩均係貢
監未入流等項其執照板片係劉東昇偷出填寫

後藏在蔡繩祖家前後書寫張數及得過銀錢多
少記憶不清本年四月內出京行抵蘇州卽被盤
獲等語又據劉東昇供稱年四十歲充當捐納房
貼寫本年正月因眼目昏花難以寫字退出要想
回南祭掃祖墓沒有伴侶託同部雲南司經承王
承乾與天津人李廷瑞結伴那李廷瑞每年往南
邊置買玉器往來熟悉就搭他的便出京到蘇城
程四房客寓住了幾天就往西湖祭墓又到堂母
舅金寶山松江寓所住了數日告借資斧見他光
景窘迫隨即回蘇仍與李廷瑞一同往北行至清

江卽被拏獲至上年八月內周載控告蔡繩祖龐
煥任松宇私給假照一案並無小的在內聞說這
案假照內有林得先等名字行查安徽省小的就
出來了並不知情等供查任松宇劉東昇均係假
照案內要犯亟應解部質究除飭委候補同知高
煥臣標署守備浦鈞管解任松宇劉東昇押赴刑
部收審外其與劉東昇同行之李廷瑞現在因病
取保咨查刑部如案內無名卽行釋放以免拖累
此外蔡應聯賞濬姚鳳山各犯臣仍督屬嚴拏務
獲解質毋稍鬆勁所有拏獲要犯各緣由謹會同

大學士兩江總督臣蔣攸銛恭摺由驛覆

奏伏乞

皇上聖鑒謹

奏

道光十年六月二十日奉到

硃批拏獲甚屬可嘉另有旨欽此同日奉到道光十年
六月十一日內閣奉

上諭陶澍奏拏獲假照案內要犯解京審辦一摺任松
宇劉東昇均與蔡繩祖等同惡相濟係假照案內最
要人犯該撫接奉諭旨飭拏卽遵派幹員分路踴緝

迅卽就獲甚屬可嘉陶澍著加恩賞加太子少保銜
以示獎勵清河縣知縣加知州銜張心淵試用府經
厯顧毓奇未入流金寶山俱著送部引見其任松宇
劉東昇二犯現經該撫委員解京沿途所過地方著
各該督撫酌派員弁按程護解迅速來京勿稍疎虞
欽此